

ओं नमः परमात्मने, श्री महागणपतये नमः,

श्री गुरुभ्यो नमः

हरिः ओं ॥

कृष्ण यजुर्वेदीय तैत्तिरीय संहिता—
पद पाठः (वाक्य सहित)

प्रथमकाण्डे प्रथमः प्रश्नः

Version Notes:

This is now the current Version 2.1 dated July 31, 2025.

1. This replaces the earlier version 2.0 dated June 30, 2024.
2. No errors found in this version .
3. Required convention, style and presentation improvements or standardisations has been done wherever applicable.
4. Notify your corrections / suggestions etc to our email id vedavms@gmail.com

Earlier Versions

1st	Version Number	0.0 dated 31st March 2019
2nd	Version Number	0.1 dated 31st March 2020
3rd	Version Number	0.2 dated 30th June 2020
4th	Version Number	0.3 dated 31st Aug 2020
5th	Version Number	1.0 dated 30th June 2021
6th	Version Number	1.0 dated 31st Oct 2021
7th	Version Number	1.1 dated 31st Aug 2022
8th	Version Number	1.1 dated 31st Oct 2023
9th	Version Number	2.0 dated 30th June 2024

Table of Contents

1	कृष्ण यजुर्वेदीय तैत्तिरीय संहिता पद पाठे प्रथमं काण्डं	11
1.1	प्रथमकाण्डे प्रथमः प्रश्नः – दर्शपूर्णमासौ.....	11

Introduction and Notes

This Taittireeya Samhita Pada Paata book is being compiled for the benefit of Veda Students for learning, with no commercial purpose. There will be 44 volumes, one book/volume for each Prasna (Subject). This book is being published in Sanskrit, Tamil and Malayalam languages.

These books are, strictly, for learning under the guidance of a qualified Vedic Guru and not meant for self-learning.

We thank our guides, **Shri Ganapathy Sharma** and **Shri Subramania Sharma**, with our namaskarams, who inspired us to compile this book.

Sources of reference:

We have referred the following two books mainly for this compilation:

1. Taittireeya Samhita printed by Mysore Branch Press in 1894. This has the complete Krishna Yayur Veda Taittireeya Samhita work of great Scholar Shri Bhatta Bhaskara Misra.
2. Taittireeya Samhita printed by Anandashram Press in 1862 containing the work of great Scholar Shri Sayanacharya.

Both these books provide the Pada Paatam of the Taittireeya Samhita at the end of the Panchatis or the end of the Anuvaham or sometimes Prasnam.

Conventions/Symbols used in this book:

We have used normal conventions for gm, gg, avagraham, Anunaasikam as in other books that have been released.

Notes and Explanations

Structure of the Book:

The Vakyam of each Panchati is given as provided in the Samhita book.

The Pada Paatam is provided immediately under each of the Panchatis.

The number of Padams in the Panchati is mentioned in bracket after Panchati number, to ensure the Padam is properly typed and coded as per Source Book.

A Panchati will have 50 Padams only. If the Panchati ends in an Anuvaham, the numbers may not be exactly 50. If the Anuvaham has only one Panchati as in **TS 1.1.1**, the Padam count comes to 43. When the count does not match 50, the indication is made through the Korvai.

If the number of Padams in the last Panchati of an Anuvaham is more than 50, the marking () is made at the end of the 50th Padam. The Korvai mentions 'Panchadasa ca) (meaning 15 Padams), we come to know that there are 50+15 = 65 Padams in that Panchati. Example **TS 1.1.6**.

Each of the Panchati will end with the Padam as per the Pada Paatam. Vakyam is also started and ended with the respective Padam as a check. The Prasna Korvai, Anuvaha Korvai and Special Korvai, if any, shall be provided after the Pada Padam of the last Panchati of the Anuvaham or Prasnam for reference. Special Korvai shall be provided at the end of respective Panchati as it is given in the source documents.

Conventions for Pada Paatam:

1. Each Panchati will end with a Padam and its Ruk Symbol.
2. Dheerga Swaritam **will be** marked in places the Swaritam needs to be extended in our book. Only the Swaritam is marked in the source books as per Pada Paata conventions.
3. While rendering or study, the rules of Dheerga Swaritam shall be applied
 - a) When a Dheerga letter with Swaritam is followed by a Conjunct Consonants (Samyukta Aksharam)
 - b) A word with a Dheerga Akshara Anuswaram in the middle of the statement with a Swaritam
 - c) The last Aksharam/letter of the Padam has **a Swaritam** and the letter is
 - a. A Dheerga Letter **or**
 - b. An Anuswaram
4. Kindly refer to our Article on Dheerga Swaritam available in our website **vedavms.in** for the article on basics of Veda Recital – Dheerga Swaritam.
5. Kindly refer to your Guru for exceptions and how the rendering needs to be made.

-
6. Some common words which are repeated in Pada Padam and what it denotes as per convention are given below:

आ + इति = एति

अति + इति = अतीति

अपि + इति = अपीति

अधि + इति = अधीति

अभि + इति = अभीति

अनु + इति = अन्विति

अव + इति = अवेति

प्र + इति = प्रेति

प्रति + इति = प्रतीति

परि + इति = परीति

परा + इति = परेति

(Special attention is to be given to this word. This is not "para" + "iti". There is no preposition in "para", but it is "parA")

निः + इति = निरिति

नि + इति = नीति

वि	+	इति	=	वीति
सु	+	इति	=	स्विति
सम्	+	इति	=	समिति
उप	+	इति	=	उपेति
उत्	+	इति	=	उदिति

Note: readers are requested to refer to the Article on Vowel Sandhi.

When a word needs to be taken as it is without any change, the Pada Padam

provides it as “**that word**” + ‘iti’. Example, Panchati 4 - विष्णो इति .

=====

Prarthanaa Mantras:

1. यो वेदादौ स्वरः प्रोक्तो वेदान्ते च प्रतिष्ठितः ।
तस्य प्रकृतिलीनस्य यः परः स महेश्वरः ।
2. ऋत॑ सत्यं परं ब्रह्म॑ पुरुषं कृष्णपिङ्गलं ।
ऊर्ध्वरेतं॑ विरूपाक्षं विश्वरूपाय वै नमो नमः । (ओं नमः परमात्मने)
3. गणानां॑ त्वा गणपति॑ हवामहे कविं कवीनामुपमश्रवस्तमं ।
ज्येष्ठराजं॑ ब्रह्मणां ब्रह्मणस्पत॑ आनश्शृण्वन्नूतिभिः सीदसादनं ।
(श्री महागणपतये नमः)
4. तत्पुरुषाय॑ विद्महे महासेनाय॑ धीमहि । तन्नः॑ षण्मुखः प्रचोदयात् ।
(कुमारगुरुवे नमः)
5. प्रणो॑ देवी सरस्वति॑ वाजेभिर्वाजिनीवति । धीनाम॑ वित्र्यवतु ।
(महासरस्वत्यै नमः)
6. सदाशिव॑ समारम्भां शंकराचार्य॑ मध्यमां ।
अस्मदाचार्य॑ पर्यन्तां वन्दे गुरु॑ परंभरां । (श्री गुरुभ्यो नमः)

7. व्यासं वसिष्ठ नप्तारं शक्तेः पौत्रमकल्मषं ।

पराशरात्मजं वन्दे शुक तातं तपोनिधिं ।

व्यासाय विष्णुरूपाय व्यासरूपाय विष्णवे ।

नमो वै ब्रह्मनिधये वासिष्ठाय नमो नमः ।

(श्री वेदव्यासाय नमः)

=====

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

1 कृष्ण यजुर्वेदीय तैत्तिरीय संहिता पद पाठे प्रथमं काण्डं

1.1 प्रथमकाण्डे प्रथमः प्रश्नः – दर्शपूर्णमासौ

TS 1.1.1.1

इ॒षे त्वो॒, - र्जे॑ त्वा॒, वा॒यवः॑ स्थो॒पायवः॑ स्थ॒, दे॒वो वः॑ स॒विता प्रा॑र्पयतु
श्रेष्ठ॑तमा॒य क॑र्म॒ण, आ॒प्याय॑द्ध्वम॒घ्निया॑ दे॒वभा॒ग-मूर्ज॑स्व॒तीः प॑यस्व॒तीः
प्र॒जाव॑ती-र॒नमी॒वा अ॑य॒क्ष्मा मा॑ वः स्ते॒न ई॒शत॑ मा ऽघ॑श॒सो, रु॒द्रस्य॑
हे॒तिः परि॑ वो वृ॒णक्तु॑, ध्रु॒वा अ॒स्मिन् गो॑प॒तौ स्या॑त ब॒ह्वीर्, य॑ज॒मान॑स्य
प॒शून् पा॑हि ॥ 1

TS 1.1.1.1 Padam

इ॒षे । त्वा॒ । ऊ॒र्जे॑ । त्वा॒ । वा॒यवः॑ । स्थ॒ । उ॒पायव॑ इत्यु॒प - आ॒यवः॑ ।
स्थ॒ । दे॒वः । वः॑ । स॒विता॑ । प्रेति॑ । अ॒र्पय॑तु । श्रेष्ठ॑तमा॒येति॑ श्रेष्ठ॑-तमा॒य ।
क॑र्म॒णे । एति॑ । प्या॒यद्ध्व॑म् । अ॒घ्नियाः॑ । दे॒वभा॒गमि॑ति दे॒व- भा॒गम् ।
ऊ॒र्जस्व॑तीः । प॑यस्व॒तीः । प्र॒जाव॑तीरि॒ति प्र॒जा-व॑तीः । अ॒नमी॒वाः ।
अ॒यक्ष्माः॑ । मा॒ । वः॑ । स्ते॒नः । ई॒शत॑ । मा॒ ।

अ॒घ॒श॒ऽस॒ इत्य॒घ – श॒ऽसः॒ । रु॒द्रस्य॑ । हे॒तिः । परी॑ति । वः ।

वृ॒ण॒क्तु॒ । ध्रु॒वाः । अ॒स्मिन् । गो॒प॒ता॒वि॒ति गो – प॒तौ । स्या॒त । ब॒ह्वीः ।

य॒ज॒मा॒नस्य॑ । प॒शून् । पा॒हि ॥ 1 (43) (इ॒षे–त्रि॒च॒त्वा॒रि॒ऽश॒त्) (A1)

TS 1.1.2.1

य॒ज्ञस्य॑ घो॒षद॑सि, प्र॒त्युष्ट॑ र॒क्षः प्र॒त्युष्टा॑ अ॒रा॒तयः॑, प्रे॒यम॑गाद्–धि॒षणा॑
ब॒र्.हि॒रच्छ॑ म॒नुना॑ कृ॒ता स्व॒धया॑ वि॒त॒ष्टा त आ॑ वह॒न्ति क॒वयः॑ पु॒रस्ता॑द्
दे॒वेभ्यो॑ जु॒ष्टमि॒ह ब॒र्.हि॒रा॒सदे॑, दे॒वानां॑ परि॒षू॒तम॑सि व॒र्.ष॑वृ॒द्धम॑सि,
दे॒वब॒र्.हि॒र्मा त्वा ऽन्व॑ङ् मा ति॒र्यक्, प॒र्व ते रा॑द्ध्य॒ास॒मा–च्छे॒त्ता ते
मा रि॒षं, दे॒वब॒र्.हिः श॒तव॑ल्.शं वि॒ रो॒ह, स॒हस्र॑वल्.शाः [] 2

TS 1.1.2.1-Padam

य॒ज्ञस्य॑ । घो॒षत् । अ॒सि । प्र॒त्युष्ट॑मि॒ति प्र॒ति – उ॒ष्टम् । र॒क्षः । प्र॒त्युष्टा॑
इति॑ प्र॒ति – उ॒ष्टाः । अ॒रा॒तयः॑ । प्रे॒ति । इ॒यम् । अ॒गात् । धि॒षणा॑ ।
ब॒र्.हिः । अ॒च्छ । म॒नुना॑ । कृ॒ता । स्व॒धये॑ति स्व–ध॒या । वि॒त॒ष्टेति॑
वि – त॒ष्टा । ते । ए॒ति । वह॒न्ति । क॒वयः॑ । पु॒रस्ता॑त् । दे॒वेभ्यः॑ ।
जु॒ष्टम् । इ॒ह । ब॒र्.हिः । आ॒सद॑ इत्या – सदे॑ । दे॒वाना॑म् ।
परि॒षू॒तमि॒ति परि॑ –सू॒तम् । अ॒सि । व॒र्.ष॑वृ॒द्धमि॒ति व॒र्.ष–वृ॒द्धम् ।

अ॒सि॒ । दे॒व॒ब॒र्हि॒रिति॒ दे॒व॒ – ब॒र्हिः॒ । मा॒ । त्वा॒ । अ॒न्वक् । मा॒ ।
ति॒र्यक् । प॒र्व॒ । ते॒ । रा॒द्ध्य॒ास॒म् । आ॒च्छे॒त्तेत्या॑ – छे॒त्ता॒ । ते॒ । मा॒ ।
रि॒षम् । दे॒व॒ब॒र्हि॒रिति॒ दे॒व॒ – ब॒र्हिः॒ । श॒तव॒ल् श॒मिति॒ श॒त – व॒ल् श॒म् ।
वी॒ति॒ । रो॒ह॒ । स॒हस्र॑व॒ल् श॒ इति॒ स॒हस्र॑ – व॒ल् श॒ः । 2 (50)

TS 1.1.2.2

वि॒ वय॑ꣳ रु॒हेम॑, पृ॒थि॒व्याः॑ स॒म्पृ॒चः॑ पा॒हि, सु॒स॒म्भृ॒ता॑ त्वा
सं॑ भ॒राम्य॑दि॒त्यै रा॒स्ना ऽसी॑न्द्रा॒ण्यै स॒न्नह॑नं, पू॒षा ते॑ ग्र॒न्थिं॑ ग्र॒थ्नातु॑,
स ते॒ मा ऽऽ स्था॑दि॒न्द्रस्य॑ त्वा बा॒हुभ्या॑मुद् – य॒च्छे, बृ॒हस्प॑तेर्
मूर्द्ध॑ना ह॒रा, – म्यु॑र्व॒न्तरि॑क्ष॒मन्वि॑हि, दे॒वङ्ग॑म॒मसि॑ ॥ 3

TS 1.1.2.2 Padam

वी॒ति॒ । वय॑म् । रु॒हेम॑ । पृ॒थि॒व्याः॑ । स॒म्पृ॒च इति॒ सं – पृ॒चः॑ । पा॒हि ।
सु॒स॒म्भृ॒तेति॑ सु – स॒म्भृ॒ता॑ । त्वा॒ । स॒मिति॑ । भ॒रामि॑ । अ॒दि॒त्यै । रा॒स्ना ।
अ॒सि॒ । इ॒न्द्रा॒ण्यै । स॒न्नह॑न॒मिति॑ सं – न॒हन॑म् । पू॒षा । ते॒ । ग्र॒न्थिम् ।
ग्र॒थ्नातु॑ । सः॑ । ते॒ । मा॒ । ए॒ति॒ । स्था॒त् । इ॒न्द्रस्य॑ । त्वा॒ । बा॒हुभ्या॑मि॒ति॑
बा॒हु – भ्या॑म् । उ॒दि॒ति॑ । य॒च्छे । बृ॒हस्प॑तेः॑ । मूर्द्ध॑ना । ह॒रामि॑ । उ॒रु ।

अ॒न्तरि॑क्षम् । अ॒न्वि॒ति॑ । इ॒हि॒ । दे॒व॒ङ्ग॒म॒मि॒ति॑ दे॒वम् – ग॒मम् ।

अ॒सि॒ ॥ ३ (३८) (स॒हस्र॑वल्॒शा–अ॒ष्टा॒त्रिं॑शच्च) (A2)

TS 1.1.3.1

शु॒न्ध॒ध्वं॑ दै॒व्याय॑ क॒र्म॒णे दे॒व॒य॒ज्यायै॑, मा॒तरि॑श्च॒नो घ॒र्मो ऽसि॒ द्यौर॑सि
पृ॒थि॒व्य॒सि वि॒श्व॒धाया॑ अ॒सि प॒र॒मे॒ण धा॒म्ना दृ॒ह॒स्व मा ह्वा॒र्, व॒सू॒नां
प॒वि॒त्र॒म॒सि श॒त॒धा॒रं व॒सू॒नां प॒वि॒त्र॒म॒सि स॒हस्र॑धा॒रं, हु॒तः स्तो॒को हु॒तो
द्र॒प्सो॑ ऽग्नये॑ बृ॒ह॒ते ना॒काय॑ स्वा॒हा द्या॒वापृ॒थि॒वीभ्या॑, सा वि॒श्वायुः॑,
सा वि॒श्व॒व्य॒चाः, सा वि॒श्व॒क॒र्मा, सं पृ॒च्य॒ध्व–मृ॒ताव॑री–रू॒र्मि॒णी–
र्म॒धु॒म॒त्त॒मा म॒न्द्रा ध॒न॒स्य सा॒तये॑, सो॒मे॒न () त्वा॒ऽऽ त॒न॒च्मी॒न्द्राय॑
द॒धि, वि॒ष्णो ह॒व्यं र॑क्ष॒स्व ॥ ४

TS 1.1.3.1-Padam

शु॒न्ध॒ध्वम् । दै॒व्याय॑ । क॒र्म॒णे । दे॒व॒य॒ज्याया॑ इति॑ दे॒व –य॒ज्यायै॑ ।
मा॒तरि॑श्च॒नः । घ॒र्मः । अ॒सि॒ । द्यौः । अ॒सि॒ । पृ॒थि॒वी । अ॒सि॒ । वि॒श्व॒धाया॑
इति॑ वि॒श्व –धा॒याः । अ॒सि॒ । प॒र॒मे॒ण । धा॒म्ना । दृ॒ह॒स्व । मा । ह्वाः ।
व॒सू॒नाम् । प॒वि॒त्र॒म् । अ॒सि॒ । श॒त॒धा॒रमि॒ति श॒त –धा॒रम् । व॒सू॒नाम् ।
प॒वि॒त्र॒म् । अ॒सि॒ । स॒हस्र॑धा॒रमि॒ति स॒हस्र॑ – धा॒रम् । हु॒तः । स्तो॒कः ।

हु॒तः । द्र॒प्सः । अ॒ग्नये॑ । बृ॒हते॑ । ना॒काय॑ । स्वा॒हा ।

द्या॒वापृ॑थि॒वीभ्या॑मि॒ति द्या॒वा- पृ॑थि॒वीभ्या॑म् । सा ।

वि॒श्वायु॑रि॒ति वि॒श्व-आ॒युः । सा ।

वि॒श्वव्य॑चा इति वि॒श्व -व्य॑चाः । सा । वि॒श्वक॑र्मेति वि॒श्व -क॑र्मा ।

समि॑ति । पृ॒च्यद्ध्व॑म् । ऋ॒ताव॑रीरित्यृ॒त - व॑रीः । ऊ॒र्मिणीः॑ । म॒धुम॑त्तमा

इति॑ म॒धुम॑त्-तमाः । म॒न्द्राः । ध॒नस्य॑ । सा॒तये॑ । सो॒मेन॑ () । त्वा ।

एति॑ । त॒न॒चिम् । इ॒न्द्राय॑ । दधि॑ । वि॒ष्णो इति॑ । ह॒व्यम् । र॒क्ष॒स्व ॥ 4

(58) (सो॒मे-ना॒ष्टौ च॑) (A3)

TS 1.1.4.1

क॑र्मणे वां दे॒वेभ्यः॑ श॒केयं॑, वै॒षाय॑ त्वा, प्र॒त्युष्ट॑ र॒क्षः प्र॒त्युष्टा॑ अ॒रातयो॑,

धू॒रसि॑ धू॒र्व धू॒र्वन्तं॑ धू॒र्व तं॑ यो॑ ऽस्मा॒न् धू॒र्वति॑ तं॑ धू॒र्वयं॑ व॒यं धू॒र्वाम्,

-स्त्वं दे॒वाना॑म॒सि स॒स्नित॑मं प॒प्रित॑मं जु॒ष्टत॑मं व॒ह्नि॑तमं दे॒वहू॑तम-

म॒हु॒तम॑सि ह॒वि॒र्धानं॑, दृ॒ह॒स्व मा॒ ह्यार॑, मि॒त्रस्य॑ त्वा चक्षु॑षा प्रेक्षे॑ मा

भे॒र्मा सं॑ वि॒क्था॑ मा त्वा -[] 5

TS 1.1.4.1-Padam

कर्म॑णे । वाम् । दे॒वेभ्यः॑ । श॒के॒यम् । वे॒षाय॑ । त्वा । प्र॒त्युष्ट॑मि॒ति
प्रति॑ – उ॒ष्टम् । रक्षः॑ । प्र॒त्युष्टा॑ इति॒ प्रति॑ – उ॒ष्टाः । अ॒रा॒तयः॑ । धूः ।
अ॒सि । धूर्व॑ । धूर्व॑न्तम् । धूर्व॑ । तम् । यः । अ॒स्मान् । धूर्व॑ति । तम् ।
धूर्व॑ । यम् । व॒यम् । धूर्वा॑मः । त्वम् । दे॒वाना॑म् । अ॒सि ।
स॒स्नि॒तम॑मि॒ति स॒स्नि॒त॒मम् । प॒प्रि॒तम॑मि॒ति प॒प्रि॒त॒मम् ।
जुष्ट॑तममि॒ति जुष्ट॑ – त॒मम् । व॒हि॒तम॑मि॒ति व॒हि॒त॒मम् ।
दे॒व॒हू॒तम॑मि॒ति दे॒व॒हू॒त॒मम् । अ॒हु॒तम् । अ॒सि ।
ह॒वि॒र्धा॒नमि॑ति॒ ह॒विः – धा॑नम् । दृ॒ह॒स्व । मा । ह्वाः ।
मि॒त्रस्य॑ । त्वा । चक्षु॑षा । प्रेति॑ । ई॒क्षे । मा । भेः । मा ।
स॒मि॒ति । वि॒क्थाः॑ । मा । त्वा । 5 (50)

TS 1.1.4.2

हि॒सि॒ष, – मु॒रु वा॑ताय, दे॒वस्य॑ त्वा स॒वि॒तुः प्र॑स॒र्वे ऽश्वि॑नो॒र्बा॒हुभ्या॑ं,
पू॒ष्णो ह॑स्ता॒भ्या – म॒ग्नये॑ जुष्टं॒ निर्व॑पा॒म्यग्नी॑षो॒माभ्या॑ – मि॒दं दे॒वाना॑ –
मि॒दमु॑ नः स॒ह, स्फा॒त्यै त्वा ना॑रा॒त्यै, सु॒व॒र॒भि वि॑ ख्ये॒षं,

वै॒श्वान॒रं ज्योति॑र, दृ॒ह॒न्तां दु॒र्या द्यावा॑पृथि॒व्यो, - रु॒र्वन्त॑रि॒क्ष
मन्वि॑, - ह्यदि॑त्यास्त्वोप॒स्थे सादया॑म्यग्ने॒ हव्य॑ रक्ष॒स्व ॥ 6

TS 1.1.4.2

हि॒सि॒षम् । उ॒रु । वा॒ताय॑ । दे॒वस्य॑ । त्वा । स॒वि॒तुः । प्र॒स॒व इति॑
प्र - स॒वे । अ॒श्विनोः॑ । बा॒हुभ्या॑मिति॒ बा॒हु - भ्याम् । पू॒ष्णः ।
हस्ता॑भ्याम् । अ॒ग्नये॑ । जु॒ष्टम् । नि॒रिति॑ । व॒षामि॑ ।
अ॒ग्नीषो॑माभ्यामि॒त्यग्नी॑ - सो॒माभ्याम् । इ॒दम् । दे॒वाना॑म् । इ॒दम् । उ॒ ।
नः । स॒ह । स्फा॒त्यै । त्वा । न । अ॒रात्यै॑ । सु॒वः । अ॒भि । वी॒ति ।
ख्ये॒षम् । वै॒श्वान॒रम् । ज्योतिः॑ । दृ॒ह॒न्ताम् । दु॒र्याः । द्यावा॑पृथि॒व्योरिति॑
द्यावा॑ - पृथि॒व्योः । उ॒रु । अ॒न्तरि॑क्षम् । अ॒न्विति॑ । इ॒हि । अदि॑त्याः ।
त्वा । उ॒पस्थ॑ इत्यु॒प-स्थे॑ । सा॒दया॑मि । अ॒ग्ने । ह॒व्यम् ।

रक्ष॒स्व ॥ 6 (46)

(मा त्वा-षट्चत्वारिंशच्च) (A4)

TS 1.1.5.1

दे॒वो वः॑ स॒वि॒तोत् पु॒ना॒त्वच्छि॑द्रेण प॒वि॒त्रेण॑ व॒सोः सूर्य॑स्य र॒श्मि॒भि,
- रा॒पो दे॒वीर॑ग्रेपु॒वो अ॒ग्रेगु॑वो ऽग्र॑ इ॒मं य॒ज्ञं न॑य॒ताग्रे॑ य॒ज्ञप॑तिं

ध॒त्त॒यु॒ष्म॒नि॒न्द्रो॑ ऽवृ॒णी॒त वृ॒त्र॒तूर्ये॑, यू॒य॒मि॒न्द्र॒मवृ॒णी॒द्ध्वं॑ वृ॒त्र॒तूर्ये॑प्रो॒क्षि॒ताः
 स्था॒, -॒ग्नये॑ वो जु॒ष्टं प्रो॒क्षा॒म्य॒ग्नी॒षो॒मा॒भ्या॒ं शु॒न्ध॒द्ध्वं॑ दै॒व्या॒य क॒र्म॒णे
 दे॒व॒य॒ज्या॒या, अ॒व॒धू॒तं र॒क्षो॑ ऽव॒धू॒ता अ॒रा॒त॒यो ऽदि॒त्या॒स्त्व॒ग॒सि
 प्र॒ति त्वा -[] 7

TS 1.1.5.1-Padam

दे॒वः । वः । स॒वि॒ता । उ॒दि॒ति । पु॒ना॒तु । अ॒च्छि॒द्रेण॑ । प॒वि॒त्रेण॑ । व॒सोः॑ ।
 सूर्य॑स्य । र॒श्मि॒भिरि॒ति र॒श्मि - भिः॑ । आ॒पः । दे॒वीः ।
 अ॒ग्रेपु॒व इत्य॑ग्रे-पु॒वः । अ॒ग्रेगु॒व इत्य॑ग्रे-गु॒वः । अ॒ग्रे । इ॒मम् । य॒ज्ञम् ।
 न॒य॒त । अ॒ग्रे । य॒ज्ञ॒प॒ति॒मि॒ति य॒ज्ञ - प॒तिम् । ध॒त्त । यु॒ष्मान् । इ॒न्द्रः ।
 अ॒वृ॒णी॒त । वृ॒त्र॒तूर्य॑ इति वृ॒त्र -तूर्ये॑ । यू॒यम् । इ॒न्द्रम् । अ॒वृ॒णी॒द्ध्वम् ।
 वृ॒त्र॒तूर्य॑ इति वृ॒त्र -तूर्ये॑ । प्रो॒क्षि॒ता इति॑ प्र -उ॒क्षि॒ताः । स्थ॒ । अ॒ग्नये॑ ।
 वः । जु॒ष्टम् । प्रेति॑ । उ॒क्षा॒मि । अ॒ग्नी॒षो॒मा॒भ्या॒मि॒त्य॒ग्नी - सो॒मा॒भ्याम् ।
 शु॒न्ध॒द्ध्वम् । दै॒व्या॒य । क॒र्म॒णे । दे॒व॒य॒ज्या॒या इति॑ दे॒व-य॒ज्यायै॑ ।
 अ॒व॒धू॒त॒मि॒त्य॒व - धू॒तम् । र॒क्षः । अ॒व॒धू॒ता इत्य॑व - धू॒ताः । अ॒रा॒त॒यः ।
 अ॒दि॒त्याः । त्वक् । अ॒सि । प्र॒ती॒ति । त्वा । 7 (50)

TS 1.1.5.2

पृथि॒वी वे॒त्त्व, -धि॒षव॑णमसि॒ वान॑स्पत्यं॒ प्रति॒ त्वा ऽदि॑त्यास्त्वग्-वे॒त्त्वग्ने-
स्तनू॑रसि॒ वाचो॑ वि॒सर्ज॑नं दे॒ववी॑तये॒ त्वा गृ॑ह्णा, -म्यद्रि॑रसि॒ वान॑स्पत्यः
स इ॒दं दे॒वेभ्यो॑ ह॒व्यं सु॒शमि॑ शमि, -ष्वे॒षमा॑ वदोर्ज॒मा वद॑ द्युमद्-
वद॑त व॒यं सङ्घा॑तं जे॒ष्म, व॒र्षवृ॑द्धमसि, प्रति॒ त्वा व॒र्षवृ॑द्धं वे॒त्तु,
परा॑पूतं रक्षः॒ परा॑पूता अ॒रातयो॑, रक्ष॑सां भा॒गो () ऽसि, वा॒युर्वो
वि वि॑नक्तु, दे॒वो वः॑ सवि॒ता हि॒रण्य॑पाणिः॒ प्रति॒ गृ॑ह्णातु ॥ 8

TS 1.1.5.2

पृथि॒वी । वे॒त्तु । अ॒धिष॑वणमित्यधि - स॒वनम् । अ॒सि । वा॒नस्प॑त्यम् ।
प्रती॑ति । त्वा । अ॒दि॒त्याः । त्वक् । वे॒त्तु । अ॒ग्नेः । त॒नूः । अ॒सि ।
वा॒चः । वि॒सर्ज॑नमिति वि-स॒र्जन॑म् । दे॒ववी॑तय इति दे॒व- वी॒तये॑ ।
त्वा । गृ॑ह्णामि । अ॒द्रिः । अ॒सि । वा॒नस्प॑त्यः । सः । इ॒दम् । दे॒वेभ्यः॑ ।
ह॒व्यम् । सु॒शमी॑ति सु- शमि । शमि॒ष्व । इ॒षम् । एति॑ । वद॑ । ऊ॒र्जम् ।
एति॑ । वद॑ । द्युमदिति द्यु-मत् । वद॑त । व॒यम् ।
सङ्घा॑तमिति सं-घा॒तम् । जे॒ष्म । व॒र्षवृ॑द्धमिति व॒र्ष-वृ॑द्धम् ।
अ॒सि । प्रती॑ति । त्वा । व॒र्षवृ॑द्धमिति व॒र्ष-वृ॑द्धम् । वे॒त्तु ।

परा॑पू॒तमि॒ति॒ परा॑ – पू॒तम् । रक्षः॑ । परा॑पू॒ता इति॒ परा॑ – पू॒ताः ।

अरा॑तयः । रक्ष॑साम् । भा॒गः () । अ॒सि॒ ।

वा॒युः । वः॑ । वी॒ति॑ । वि॒नक्तु॑ । दे॒वः । वः॑ । स॒वि॒ता ।

हि॒र॒ण्यपा॒णिरि॒ति॒ हि॒र॒ण्य – पा॒णिः । प्र॒ती॒ति॑ । गृ॒ह्णा॒तु ॥ 8 (61)

(त्वा – भा॒ग – एका॑दश च) (A5)

TS 1.1.6.1

अव॑धू॒तꣳ रक्षो॑ ऽव॑धू॒ता अरा॑तयो॒ ऽदि॒त्यास्त्व॑ग॒सि॒ प्रति॑ त्वा पृ॒थि॒वी वे॑त्तु,
दि॒वः स्क॑भ॒निर॑सि॒ प्रति॑ त्वा ऽदि॒त्यास्त्व॑ग्-वे॑त्तु, धि॒षणा॑ ऽसि॒ पर्व॑त्या
प्रति॑ त्वा दि॒वः स्क॑भ॒निर्वे॑त्तु, धि॒षणा॑ ऽसि॒ पार्व॑तेयी॒ प्रति॑ त्वा पर्व॑ति वे॑त्तु,
दे॒वस्य॑ त्वा स॒वि॒तुः प्र॑स॒वे ऽश्वि॑नो॒र्बाहु॑भ्यां॒ पू॒ष्णोह॑स्ता॒भ्याम॑धि॒ वपा॑मि
धा॒न्यम॑सि॒ धि॒नुहि॑ दे॒वान्, प्रा॒णाय॑ त्वा, () ऽपा॒नाय॑ त्वा, व्या॒नाय॑ त्वा,
दी॒र्घाम॑नु॒ प्र॑सि॒तिमा॑यु॒षे धां, दे॒वो वः॑ स॒वि॒ता हि॒र॒ण्यपा॒णिः
प्रति॑ गृ॒ह्णा॒तु ॥ 9

TS 1.1.6.1-Padam

अव॑धू॒तमित्य॑व – धू॒तम् । रक्षः॑ । अव॑धू॒ता इत्य॑व – धू॒ताः । अरा॑तयः ।

अदि॑त्याः । त्वक् । अ॒सि॒ । प्र॒ती॒ति॑ । त्वा । पृ॒थि॒वी । वे॑त्तु । दि॒वः ।

स्क॒म्भ॒निः । अ॒सि॒ । प्र॒ती॒ति॑ । त्वा॒ । अ॒दि॒त्याः । त्वक् । वे॒त्तु॒ । धि॒ष॒णा॑ ॥
 अ॒सि॒ । प॒र्व॒त्या । प्र॒ती॒ति॑ । त्वा॒ । दि॒वः । स्क॒म्भ॒निः । वे॒त्तु॒ । धि॒ष॒णा॑ ॥
 अ॒सि॒ । पा॒र्व॒ते॒यी । प्र॒ती॒ति॑ । त्वा॒ । प॒र्व॒तिः । वे॒त्तु॒ । दे॒व॒स्य॑ । त्वा॒ ।
 स॒वि॒तुः । प्र॒स॒व॒ इति॑ प्र – स॒वे । अ॒श्वि॒नोः॑ । बा॒हु॒भ्या॒मिति॑ – बा॒हु॒भ्या॒म् ।
 पू॒ष्णः॑ ॥ ह॒स्ता॒भ्या॒म् । अधी॑ति । व॒पा॒मि॒ । धा॒न्य॒म् । अ॒सि॒ । धि॒नु॒हि॒ ।
 दे॒वान् । प्रा॒णा॒येति॑ प्र – अ॒नाय॑ । त्वा॒ () । अ॒पा॒ना॒येत्य॑प – अ॒नाय॑ ।
 त्वा॒ । व्या॒ना॒येति॑ वि – अ॒नाय॑ । त्वा॒ । दी॒र्घा॒म् । अ॒न्वि॒ति॑ ।
 प्र॒सि॒ति॒मिति॑ प्र – सि॒ति॒म् । आ॒यु॒षे । धा॒म् । दे॒वः । वः । स॒वि॒ता ।
 हि॒र॒ण्य॒पा॒णि॒रिति॑ हि॒र॒ण्य॒ – पा॒णिः॑ । प्र॒ती॒ति॑ । गृ॒ह्णा॒तु ॥ 9 (65)

(प्रा॒णाय॑ त्वा – पञ्च॑दश च) (A6)

TS 1.1.7.1

धृ॒ष्टि॒रसि॑ ब्र॒ह्म॒ यच्छा॑पा॒ग्ने ऽग्नि॑मा॒मादं॑ ज॒हि, नि॑ ष्क्र॒व्याद॑ ॐ से॒धाऽऽ
 दे॒व॒य॒जं॑ व॒ह, नि॒र्द॒ग्ध॑ ॐ र॒क्षो॒ नि॒र्द॒ग्धा॒ अ॒रा॒त॒यो ध्रु॑व॒म॒सि पृ॒थि॒वीं
 दृ॒हाऽऽयु॑र्दृ॒ह प्र॒जां दृ॒ह स॒जा॒ता॒न॒स्मै य॑ज॒मा॒नाय॑ प॒र्यू॒ह,

ध॒र्त्र॑म॒स्य॒न्त॒रि॒क्षं॑ दृ॒ह प्रा॒णं दृ॒हा॒पा॒नं दृ॒ह स॒जा॒ता॒न॒स्मै॑ यज॑मा॒नाय॒
पर्यू॑ह, ध॒रु॒ण॑म॒सि दि॒वं दृ॒ह चक्षु॑र् -[] 10

TS 1.1.7.1-Padam

धृ॒ष्टिः । अ॒सि । ब्र॒ह्म । य॒च्छ । अ॒पेति॑ । अ॒ग्ने । अ॒ग्नि॒म् ।
आ॒मा॒द॒मि॒त्याम् -अ॒दम् । ज॒हि । नि॒रिति॑ । क॒व्या॒द॒मि॒ति क॒व्य-अ॒दम् ।
से॒ध । ए॒ति । दे॒व॒य॒ज॒मि॒ति दे॒व - य॒जम् । व॒ह । नि॒र्द॒ग्ध॒मि॒ति
निः - द॒ग्ध॒म् । र॒क्षः । नि॒र्द॒ग्धा इति॑ निः- द॒ग्धाः । अ॒रा॒त॒यः । ध्रु॒वम् ।
अ॒सि । पृ॒थि॒वी॒म् । दृ॒ह । आ॒युः । दृ॒ह । प्र॒जा॒मि॒ति प्र -जा॒म् ।
दृ॒ह । स॒जा॒ता॒नि॒ति स-जा॒तान् । अ॒स्मै । य॒ज॒मा॒नाय॑ । प॒रीति॑ । ऊ॒ह ।
ध॒र्त्र॑म् । अ॒सि । अ॒न्त॒रि॒क्षम् । दृ॒ह । प्रा॒ण॒मि॒ति प्र- अ॒नम् । दृ॒ह ।
अ॒पा॒न॒मि॒त्यप॑ - अ॒नम् । दृ॒ह । स॒जा॒ता॒नि॒ति स-जा॒तान् । अ॒स्मै ।
य॒ज॒मा॒नाय॑ । प॒रीति॑ । ऊ॒ह । ध॒रु॒णम् । अ॒सि । दि॒वम् । दृ॒ह ।
चक्षुः॑ । 10 (50)

TS 1.1.7.2

दृ॒ह श्रो॒त्रं दृ॒ह स॒जा॒ता॒न॒स्मै॑ यज॑मा॒नाय॒ पर्यू॑ह, ध॒र्मा॑सि दि॒शो
दृ॒ह यो॒निं दृ॒ह प्र॒जां दृ॒ह स॒जा॒ता॒न॒स्मै॑ यज॑मा॒नाय॒ पर्यू॑ह, चि॒तः

स्थ प्रजामस्मै रयिमस्मै सजातानस्मै यजमानाय पर्यूह, भृगूणामङ्गिरसां
तपसा तप्यद्ध्वं, यानि घर्मे कपालान्युप-चिन्वन्ति वेधसः ।
पूष्णस्तान्यपि व्रत इन्द्रवायू वि मुञ्चतां ॥ 11

TS 1.1.7.2-Padam

दृ॒ह । श्रो॒त्रम् । दृ॒ह । स॒जा॒ता॒निति॑ स-जा॒तान् । अ॒स्मै ।
यज॑मानाय । परी॑ति । ऊ॒ह । ध॒र्म । अ॒सि । दि॒शः । दृ॒ह । यो॒निम् ।
दृ॒ह । प्र॒जा॒मिति॑ प्र -जा॒म् । दृ॒ह । स॒जा॒ता॒निति॑ स-जा॒तान् ।
अ॒स्मै । यज॑मानाय । परी॑ति । ऊ॒ह । चि॒तः । स्थ । प्र॒जा॒मिति॑
प्र -जा॒म् । अ॒स्मै । र॒यिम् । अ॒स्मै । स॒जा॒ता॒निति॑ स-जा॒तान् ।
अ॒स्मै । यज॑मानाय । परी॑ति । ऊ॒ह । भृ॒गू॒णाम् । अ॒ङ्गि॒रसाम् । तप॑सा ।
तप्य॑द्ध्वम् । या॒नि । घ॒र्मे । क॒पा॒ला॒नि । उ॒प॒चि॒न्वन्तीत्यु॑प - चि॒न्वन्ति॑ ।
वे॒ध॒सः ॥ पू॒ष्णः । ता॒नि । अ॒पी॒ति । व्र॒ते । इ॒न्द्र॒वा॒यू इती॑न्द्र-वा॒यू ।
वी॒ति । मु॒ञ्च॒ताम् ॥ 11 (48) (चक्षु॑ - र॒ष्टा॒च॒त्वा॒रि॒ञ्च॒) (A7)

TS 1.1.8.1

सं व॑पामि, समा॑पो अ॒दि॒भर॑गमत॒ समो॑षधयो रसे॑नस॒ रेव॑तीर्
जग॑तीभिर् मधु॑मतीर्मधु॑मतीभिः सृ॒ज्यद्ध्व॑, -म॒द्भ्यः परि॑ प्रजा॑ताः

स्थ सम॒द्धिः पृ॒च्यद्ध्वं॑, जन॑यत्यै त्वा सं यौ॑म्य॒ग्नये॑ त्वा, अ॒ग्नीषो॑मा॒भ्यां॑,
म॒खस्य॑ शिरो॑ ऽसि, घ॒र्मो ऽसि॑ वि॒श्वायु॑, -रुरु॑ प्रथ॒स्वोरु॑ ते य॒ज्ञप॑तिः
प्रथ॑तां, त्वचं॑ गृ॒ह्णी, -ष्वान्तरि॑तꣳ रक्षो॑ ऽन्तरि॑ता अ॒रात॑यो, दे॒वस्त्वा
सवि॑ता () श्रप॑यतु व॒र्षि॒ष्ठे अधि॑ नाके॒ ऽग्निस्ते॑ त॒नुवं॒ मा ऽति॑ धा॒गग्ने॑
ह॒व्यꣳ रक्ष॑स्व, सं ब्र॒ह्मणा॑ पृ॒च्य, -स्वैक॑ताय॒ स्वाहा॑, द्वि॒ताय॒ स्वाहा॑,
त्रि॒ताय॒ स्वाहा॑ ॥ 12

TS 1.1.8.1 –Padam

समि॑ति । व॒पामि॑ । समि॑ति । आपः॑ । अ॒द्भिरि॑त्यत् - भिः । अ॒ग॒मत॑ ।
समि॑ति । ओष॑धयः । र॒सेन॑ । समि॑ति । रे॒वतीः॑ । ज॒गती॑भिः ।
मधु॑मतीरि॒ति मधु॑ - म॒तीः । मधु॑मतीभि॒रिति॑ मधु॑ - म॒तीभिः॑ ।
सृ॒ज्यद्ध्व॑म् । अ॒द्भ्य इ॒त्यत् - भ्यः॑ । प॒रीति॑ ।
प्रजा॑ता इति॒ प्र -जा॑ताः । स्थ॑ । समि॑ति । अ॒द्भिरि॑त्यत् - भिः ।
पृ॒च्यद्ध्व॑म् । जन॑यत्यै । त्वा । समि॑ति । यौमि॑ । अ॒ग्नये॑ । त्वा ।
अ॒ग्नीषो॑मा॒भ्यामि॒त्यग्नी॑ - सोमा॒भ्याम् । म॒खस्य॑ । शि॒रः । अ॒सि ।
घ॒र्मः । अ॒सि । वि॒श्वायु॑रु॒रिति॑ वि॒श्व- आ॒युः । उ॒रु ।

प्र॒थ॒स्व । उ॒रु । ते । य॒ज्ञ॒प॒ति॒रि॒ति य॒ज्ञ – प॒तिः । प्र॒थ॒ता॒म् ।
 त्व॒च॒म् । गृ॒ह्णी॒ष्व । अ॒न्त॒रि॒त॒मि॒त्य॒न्तः – इ॒त॒म् । रक्षः । अ॒न्त॒रि॒ता
 इ॒त्य॒न्तः – इ॒ताः । अ॒रा॒त॒यः । दे॒वः । त्वा । स॒वि॒ता () । श्र॒प॒य॒तु ।
 व॒र्षि॒ष्ठे । अधी॒ति । ना॒के॑ । अ॒ग्निः । ते । त॒नु॒व॒म् । मा । अ॒ती॒ति ।
 धा॒क् । अ॒ग्ने॑ । ह॒व्य॒म् । रक्ष॒स्व । स॒मि॒ति । ब्र॒ह्म॒णा । पृ॒च्य॒स्व ।
 ए॒क॒ता॒य । स्वा॒हा॑ । द्वि॒ता॒य । स्वा॒हा॑ । त्रि॒ता॒य । स्वा॒हा॑ ॥ 12 (72)

(स॒वि॒ता–द्वा॒वि॒ंश॒तिश्च) (A8)

TS 1.1.9.1

आ द॒द, इ॒न्द्र॒स्य॒ बा॒हु॒र॒सि॒ दक्षि॑णः स॒ह॒स्र॑भृष्टिः श॒त॒ते॒जा॒वा॒यु॒र॒सि
 ति॒ग॒म॒ते॒जाः, पृ॒थि॒वि दे॒व॒य॒ज–न्योष॑द्ध्यास्ते मूलं मा हि॒ं॒सि॒ष,–
 म॒प॒ह॒तो ऽरुः॑ पृ॒थि॒व्यै, ब्र॒जं ग॑च्छ गो॒स्थानं, व॒र्ष॒तु ते॒ द्यौर्ब॑धान दे॒व
 स॒वि॒तः प॒र॒म॒स्यां प॒रा॒व॒ति श॒तेन॑ पा॒शैर्यो॑ ऽस्मा॒न् द्वेष्टि॑ यं च व॒यं
 द्वि॒ष्म॒स्त॒म॒तो मा॒ मौ॒ग॒प॒ह॒तो ऽरुः॑ पृ॒थि॒व्यै दे॒व॒य॒ज॒न्यै, ब्र॒जं –[] 13

TS 1.1.9.1 –Padam

ए॒ति । द॒दे । इ॒न्द्र॒स्य । बा॒हुः । अ॒सि । दक्षि॑णः । स॒ह॒स्र॑भृष्टि॒रि॒ति
 स॒ह॒स्र –भृ॒ष्टिः । श॒त॒ते॒जा इति॑ श॒त –ते॒जाः । वा॒युः । अ॒सि ।

ति॒ग्मते॑जा॒ इति॑ ति॒ग्म – ते॒जाः । पृ॒थि॒वि । दे॒व॒य॒ज॒नीति॑ दे॒व – य॒ज॒नि ।
 ओष॑द्द॒ध्याः । ते । मूल॑म् । मा । हि॒॒सि॒षम् । अ॒प॒ह॒त इत्य॑प – ह॒तः ।
 अ॒र॒रुः । पृ॒थि॒व्यै । व्र॒जम् । ग॒च्छ । गो॒स्थान॑मि॒ति गो॒–स्थान॑म् ।
 व॒र्ष॒तु । ते । द्यौः । ब॒धान॑ । दे॒व । स॒वि॒तः । प॒र॒म॒स्याम् ।
 प॒रा॒व॒तीति॑ प॒रा – व॒ति । श॒तेन॑ । पा॒शैः । यः । अ॒स्मान् । द्वेष्टि॑ । यम् ।
 च । व॒यम् । द्वि॒ष्मः । तम् । अ॒तः । मा । मौक् । अ॒प॒ह॒त इत्य॑प – ह॒तः ।
 अ॒र॒रुः । पृ॒थि॒व्यै । दे॒व॒य॒ज॒न्या इति॑ दे॒व – य॒ज॒न्यै । व्र॒जम् । 13 (50)

TS 1.1.9.2

ग॒च्छ गो॒स्थानं॑, ँव॑र्ष॒तु ते द्यौर्ब॑धान॒ दे॒व स॒वि॒तः प॒र॒म॒स्यां प॒रा॒व॒ति
 श॒तेन॑ पा॒शैर्यो॑ ऽस्मान् द्वेष्टि॑ यं च॒ व॒यं द्वि॒ष्मस्त॑मतो॒ मा मौ॑ग॒प॒हतो॑ ऽर॒रुः
 पृ॒थि॒व्या अ॒दे॒व॒य॒ज॒नो, व्र॒जं ग॒च्छ गो॒स्थानं॑, ँव॑र्ष॒तु
 ते द्यौर्, ब॒धान॑ दे॒व स॒वि॒तः प॒र॒म॒स्यां प॒रा॒व॒ति श॒तेन॑
 पा॒शैर्यो॑ ऽस्मान् द्वेष्टि॑ यं च॒ व॒यं द्वि॒ष्मस्त॑मतो॒ मा – [] 14

TS 1.1.9.2 –Padam

ग॒च्छ । गो॒स्थान॑मि॒ति गो॒–स्थान॑म् । व॒र्ष॒तु । ते । द्यौः । ब॒धान॑ । दे॒व ।
 स॒वि॒तः । प॒र॒म॒स्याम् । प॒रा॒व॒तीति॑ प॒रा – व॒ति । श॒तेन॑ । पा॒शैः । यः ।

अ॒स्मान् । द्वेष्टि॑ । यम् । च॒ । व॒यम् । द्विष्मः॑ । तम् । अतः॑ । मा ।
 मौक् । अप॑हत॒ इत्यप॑ – ह॒तः । अ॒ररुः । पृ॒थि॒व्याः । अ॒दे॒व॒य॒ज॒न॒
 इत्य॑दे॒व – य॒ज॒नः । व्र॒जम् । ग॒च्छ । गो॒स्थान॑मि॒ति गो॑–स्थानम् ॥
 वर्ष॑तु । ते । द्यौः । ब॒धान॑ । दे॒व । स॒वि॒तः । प॒र॒म॒स्याम् ।
 प॒रा॒व॒तीति॑ प॒रा – व॒ति । श॒तेन॑ । पा॒शैः । यः । अ॒स्मान् । द्वेष्टि॑ । यम् ।
 च॒ । व॒यम् । द्विष्मः॑ । तम् । अतः॑ । मा । 14 (50)

TS 1.1.9.3

मौ, – ग॒र॒रु॒स्ते दि॒वं मा॒ स्का॒न्., व॒स॒व॒स्त्वा प॒रि गृ॑ह्णन्तु गाय॒त्रेण॑ छ॒न्द॒सा,
 रु॒द्रा॒स्त्वा प॒रि गृ॑ह्णन्तु त्रैष्टु॒भेन॑ छ॒न्द॒सा ऽऽदि॒त्या॒स्त्वा प॒रि गृ॑ह्णन्तु जा॒ग॒तेन॑
 छ॒न्द॒सा, दे॒व॒स्य॑ स॒वि॒तुः स॒वे क॑र्म कृ॒ण्व॒न्ति वे॒ध॒स, ऋ॒त॒म, –
 स्य॑त॒स॒द॒न॒म, – स्य॑त॒श्री॒र॒सि, धा॑ अ॒सि स्व॒धा अ॒स्यु॒र्वी चा॒सि व॒स्वी चा॒सि
 पु॒रा कू॒र॒स्य॑ वि॒सृ॒पो वि॒र॒प्ति॒न्, () नु॒दा॒दा॒य पृ॒थि॒वीं
 जी॒र॒दा॒नु॒र्यामै॑र॒यन् च॒न्द्र॒म॒सि स्व॒धा॒भि॒स्तां धी॑रा॒सो अ॒नु॒दृ॒श्य॑ य॒ज॒न्ते ॥ 15

TS 1.1.9.3 –Padam

मौक् । अ॒ररुः । ते । दि॒वम् । मा । स्का॒न् । व॒स॒वः । त्वा । प॒रीति॑ ।
 गृ॒ह्ण॒न्तु । गा॒य॒त्रेण॑ । छ॒न्द॒सा । रु॒द्राः । त्वा । प॒रीति॑ । गृ॒ह्ण॒न्तु । त्रैष्टु॒भेन॑ ।

छन्दसा । आदित्याः । त्वा । परीति । गृह्णन्तु । जागतेन । छन्दसा ।
 देवस्य । सवितुः । सवे । कर्म । कृण्वन्ति । वेधसः । ऋतम् । असि ।
 ऋतसदनमित्यृत – सदनम् । असि । ऋतश्रीरित्यृत – श्रीः । असि ।
 धाः । असि । स्वधेति स्व- धा । असि । उर्वी । च । असि । वस्वी ।
 च । असि । पुरा । क्रूरस्य । विसृप इति वि- सृपः ।
 विरप्शिन्निति वि- रप्शिन् () । उदादायेत्युत् – आदाय । पृथिवीम् ।
 जीरदानुरिति जीर – दानुः । याम् । ऐरयन् । चन्द्रमसि ।
 स्वधाभिरिति स्व-धाभिः । ताम् । धीरासः ।
 अनुदृश्येत्यनु – दृश्य । यजन्ते ॥ 15 (61)

(देवयजन्यै व्रजं – तमतो मा – विरप्शिन् – नैकादश च) (A9)

TS 1.1.10.1

प्रत्युष्टꣳ रक्षः प्रत्युष्टा अरातयो, ऽग्नेर्वस्तेजिष्ठेन तेजसा निष्टपामि,
 गोष्ठं मा निर्मृक्षं वाजिनं त्वा सपत्नसाहꣳ सं माज्मि, वाचं प्राणं,
 चक्षुः श्रोत्रं, प्रजां योनिं मा निर्मृक्षं वाजिनीं त्वा सपत्नसाहीꣳ
 सं मार्ज्म्या, शासाना सौमनसं प्रजाꣳ सौभाग्यं तनूं ।

अ॒ग्ने॒रनु॑व्र॒ता भू॒त्वा सं न॑ह्ये सु॒कृ॒ताय॑ कं ॥

सु॒प्र॒ज॒स॒स्त्वा व॒यꣳ सु॒प॒त्नी॒रुप॑ –[] 16

TS 1.1.10.1 –Padam

प्र॒त्यु॒ष्ट॒मि॒ति॒ प्र॒ति – उ॒ष्ट॒म् । रक्षः॑ । प्र॒त्यु॒ष्टा इति॑ प्र॒ति – उ॒ष्टाः॑ ।
अ॒रा॒तयः॑ । अ॒ग्नेः॑ । वः॑ । ते॒जि॒ष्ठेन॑ । ते॒ज॒सा । नि॒रि॒ति॑ । त॒पा॒मि॒ ।
गो॒ष्ठ॒मि॒ति॑ गो – स्थम् । मा । नि॒रि॒ति॑ । मृ॒क्षम् । वा॒जि॒नम्॑ । त्वा ।
स॒प॒त्न॒सा॒ह॒मि॒ति॑ स॒प॒त्न – सा॒हम् । स॒मि॒ति॑ । मा॒र्जि॒र्म । वा॒चम्॑ ।
प्रा॒ण॒मि॒ति॑ प्रा– अ॒नम् । चक्षुः॑ । श्रो॒त्रम्॑ । प्र॒जा॒मि॒ति॑ प्र – जा॒म् ।
यो॒नि॒म् । मा । नि॒रि॒ति॑ । मृ॒क्षम् । वा॒जि॒नीम्॑ । त्वा । स॒प॒त्न॒सा॒ही॒मि॒ति॑
स॒प॒त्न– सा॒हीम् । स॒मि॒ति॑ । मा॒र्जि॒र्म । आ॒शा॒सा॒नेत्या॑ – शा॒सा॒ना ।
सौ॒म॒न॒सम् । प्र॒जा॒मि॒ति॑ प्र – जा॒म् । सौ॒भा॒ग्यम्॑ । त॒नूम् ॥ अ॒ग्नेः॑ ।
अ॒नु॒व्र॒ते॒त्यनु॑ – व्र॒ता । भू॒त्वा । स॒मि॒ति॑ । न॒ह्ये॑ ।
सु॒कृ॒ता॒येति॑ सु – कृ॒ताय॑ । कम् ॥ सु॒प्र॒ज॒स इति॑ सु–प्र॒ज॒सः॑ ।
त्वा । व॒यम् । सु॒प॒त्नी॒रिति॑ सु–प॒त्नीः॑ । उपेति॑ । 16 (50)

TS 1.1.10.2

सेदि॒म ।

अ॒ग्ने॑ स॒प॒त्न॒द॒म्भ॒न॒म॒द॒ब्धा॒सो॒ अ॒दा॒भ्यं॑ ॥

इ॒मं वि॑ ष्या॒मि व॒रु॒णस्य॑ पा॒शं य॑म॒ब॒द्ध्नी॑त स॒वि॒ता सु॒के॒तः ।

धा॒तुश्च॑ यो॒नौ सु॒कृ॒तस्य॑ लो॒के स्यो॒नं मे॑ स॒ह प॒त्या॑ करो॒मि ॥

स॒मा॒यु॒षा सं प्र॒जया॑ स॒म॒ग्ने वर्च॑सा पुनः ।

सं प॒त्नी प॒त्या ऽहं॑ ग॒च्छे स॒मा॒त्मा त॒नुवा॑ म॒म ॥

म॒ही॒नां प॒यो ऽस्यो॑ष॒धी॒नां र॒स॒स्तस्य॑ ते ऽक्षी॑यमाणस्य निर् -[] 17

TS 1.1.10.2 –Padam

से॒दि॒म ॥ अ॒ग्ने॑ । स॒प॒त्न॒द॒म्भ॒न॒मि॒ति स॒प॒त्न॒-द॒म्भ॒न॒म् । अ॒द॒ब्धा॒सः ।

अ॒दा॒भ्य॒म् ॥ इ॒म॒म् । वी॒ति॑ । स्या॒मि । व॒रु॒णस्य॑ । पा॒श॒म् । य॒म् ।

अ॒ब॒द्ध्नी॑त । स॒वि॒ता । सु॒के॒त इति॑ सु-के॒तः ॥ धा॒तुः । च॒ । यो॒नौ॑ ।

सु॒कृ॒तस्ये॑ति सु -कृ॒तस्य॑ । लो॒के । स्यो॒न॒म् । मे॑ । स॒ह । प॒त्या॑ ।

करो॒मि ॥ स॒मि॒ति॑ । आ॒यु॒षा । स॒मि॒ति॑ । प्र॒जये॑ति प्र-जया॑ । स॒मि॒ति॑ ।

अ॒ग्ने॑ । वर्च॑सा । पुनः॑ ॥ स॒मि॒ति॑ । प॒त्नी॑ । प॒त्या॑ । अ॒ह॒म् । ग॒च्छे॑ ।

समि॑ति । आ॒त्मा । त॒नुवा॑ ॥ म॒म ॥ म॒हीना॑म् । प॒यः । अ॒सि॒ ।
ओष॑धीनाम् । र॒सः । त॒स्य । ते॒ । अक्षी॑यमाणस्य । निरि॑ति । 17 (50)

TS 1.1.10.3

व॒पा॒मि, म॒हीनां॑ प॒यो ऽस्योष॑धीनां॒ र॒सो ऽद॒ब्धेन॑ त्वा चक्षु॑षा ऽवे॑क्षे
सुप्र॑जास्त्वाय, तेजो॑ ऽसि, तेजो॑ ऽनु प्रे, - ह्यग्नि॑स्ते तेजो॑ मा वि
नै, - दग्ने॑र्जिह्वा ऽसि सु॒भूर्दे॒वानां॑ धाम्ने॑धाम्ने दे॒वेभ्यो॑ यजु॑षेयजुषे भव,
शुक्र॑मसि, ज्योति॑रसि, तेजो॑ ऽसि, दे॒वो वः॑ सवि॒तोत् पु॒नात्व॑च्छि॒द्रेण॑
पवि॑त्रेण व॒सोः सूर्य॑स्य रश्मि॑भिः, शुक्रं॑ () त्वा शु॒क्रायां॑ धाम्ने॑धाम्ने
दे॒वेभ्यो॑ यजु॑षेयजुषे गृह्णामि, ज्योति॑स्त्वा ज्योति॑ष्यर्चि॒स्त्वा ऽर्चि॑षि
धाम्ने॑धाम्ने दे॒वेभ्यो॑ यजु॑षेयजुषे गृह्णामि ॥ 18

TS 1.1.10.3 –Padam

व॒पा॒मि । म॒हीना॑म् । प॒यः । अ॒सि॒ । ओष॑धीनाम् । र॒सः । अ॒द॒ब्धेन॑ ।
त्वा । चक्षु॑षा । अ॒वेति॑ । ई॒क्षे । सुप्र॑जास्त्वायेति सुप्र॑जाः - त्वाय॑ ।
तेजः॑ । अ॒सि॒ । तेजः॑ । अ॒नु । प्रेति॑ । इ॒हि । अ॒ग्निः । ते॒ । तेजः॑ । मा ।
वीति॑ । नैत् । अ॒ग्नेः । जि॒ह्वा । अ॒सि॒ । सु॒भूरिति॑ सु - भूः । दे॒वाना॑म् ।
धाम्ने॑धाम्न इति॑ धाम्ने॑ - धाम्ने॑ । दे॒वेभ्यः॑ ।

य॒जु॒षे॒य॒जु॒ष इति॑ य॒जु॒षे – य॒जु॒षे । भ॒व । शु॒क्रम् । अ॒सि॒ । ज्योतिः॑ ।
 अ॒सि॒ । तेजः॑ । अ॒सि॒ । दे॒वः । वः । स॒वि॒ता । उ॒दि॒ति॒ । पु॒ना॒तु ।
 अ॒च्छि॒द्रेण॑ । प॒वि॒त्रेण॑ । व॒सोः॑ । सूर्य॑स्य । र॒श्मि॒भि॒रिति॑ र॒श्मि॒-भिः॑ ।
 शु॒क्रम् () । त्वा । शु॒क्रा॒याम् । धाम्ने॑ धाम्न इति॑ धाम्ने॑ – धाम्ने॑ ।
 दे॒वेभ्यः॑ । य॒जु॒षे॒य॒जु॒ष इति॑ य॒जु॒षे – य॒जु॒षे । गृ॒ह्णामि॑ । ज्योतिः॑ । त्वा ।
 ज्योति॑षि । अ॒र्चिः । त्वा । अ॒र्चि॑षि । धाम्ने॑ धाम्न इति॑ धाम्ने॑ – धाम्ने॑ ।
 दे॒वेभ्यः॑ । य॒जु॒षे॒य॒जु॒ष इति॑ य॒जु॒षे – य॒जु॒षे । गृ॒ह्णामि॑ ॥ 18 (66)

(उप – नी – रश्मिभिः शुक्रं – षोडश च) (A10)

TS 1.1.11.1

कृ॒ष्णो॑ ऽस्या॒खरे॒ष्ठो॑ ऽग्नये॑ त्वा स्वाहा, वे॒दि॒र॒सि॒ बर्हि॑षे त्वा स्वाहा,
 बर्हि॑र॒सि॒ सु॒ग्भ्य॑स्त्वा स्वाहा, दि॒वे त्वा, ऽन्त॑रि॒क्षाय॑ त्वा, पृ॒थि॒व्यै त्वा,
 स्व॒धा पि॒तृ॒भ्य ऊ॒र्ध्व बर्हि॑षद्भ्य ऊ॒र्जा पृ॒थि॒वीं ग॑च्छ॒तवि॑ष्णोः
 स्तू॒पो ऽस्यू॑र्णाम्र॒दसं॑ त्वा स्तृ॒णामि॑ स्वा॒स॒स्थं दे॒वेभ्यो॑ गन्ध॒र्वो ऽसि॑
 वि॒श्वाव॑सुर् वि॒श्वस्मा॑दी॒षतो॑ य॒ज॒मा॒नस्य॑ प॒रि॒धि॒रि॒ड ई॒डि॒तइ॑न्द्रस्य
 बा॒हुर॑सि – [] 19

TS 1.1.11.1 –Padam

कृ॒ष्णः । अ॒सि । आ॒ख॒रे॒ष्ठ इ॒त्या॒ख॒रे – स्थः । अ॒ग्नये॑ । त्वा । स्वा॒हा ।
वेदिः । अ॒सि । ब॒र्हिषे॑ । त्वा । स्वा॒हा । ब॒र्हिः । अ॒सि । सु॒ग्भ्य इति॑
सुक् –भ्यः । त्वा । स्वा॒हा । दि॒वे । त्वा । अ॒न्तरि॑क्षाय । त्वा ।
पृ॒थि॒व्यै । त्वा । स्व॒धेति॑ स्व–धा । पि॒तृ॒भ्य इति॑ पि॒तृ –भ्यः । ऊ॒र्क् ।
भव । ब॒र्हिष॑द्भ्य इति॑ ब॒र्हिष॑त्–भ्यः । ऊ॒र्जा । पृ॒थि॒वीम् । ग॒च्छ॒त ।
विष्णोः॑ । स्तूपः । अ॒सि । ऊ॒र्णाम्र॑दसमित्यूर्णा – म्रद॒सम् । त्वा ।
स्तृ॒णामि॑ । स्वा॒स॒स्थमि॑ति सु –आ॒स॒स्थम् । दे॒वे॒भ्यः । ग॒न्ध॒र्वः ।
अ॒सि । वि॒श्वाव॑सुरिति॑ वि॒श्व – व॒सुः । वि॒श्वस्मा॑त् । ई॒षतः॑ ।
यज॑मानस्य । परि॒धिरि॑ति परि – धिः । इ॒डः । ई॒डि॒तः । इ॒न्द्रस्य॑ ।

बा॒हुः । अ॒सि । 19 (50)

TS 1.1.11.2

दक्षि॑णो यज॑मानस्य परि॒धिरि॑ड ई॒डि॒तो मि॒त्राव॑रुणौ त्वोत्तर॑तः परि॑ धत्तां
ध्रु॒वेण॑ धर्म॑णा यज॑मानस्य परि॒धिरि॑ड ई॒डि॒तः सूर्य॑स्त्वा पु॒रस्ता॑त् पातु
कस्या॑श्चिद॒भि॒श॒स्त्या॒वीति॑होत्रं त्वा कवे॑ द्यु॒मन्त॑ꣳ समि॑धीम॒ह्यग्ने॑
बृ॒हन्त॑म॒ध्वरे॑ वि॒शो य॒न्त्रे स्थो॑ वसू॒नाꣳ रु॒द्राणा॑–मादि॒त्यानाꣳ

सद॑सि सीद॑ जु॒हूरु॑प॒भृद् ध्रु॒वा ऽसि॑ घृ॒ताची॑ नाम्ना॑ प्रि॒येण॑ नाम्ना॑ प्रि॒ये
सद॑सि () सीदै॒ता अस॑दन्त् सु॒कृत॑स्य लो॒के ता वि॑ष्णो पाहि पाहि
य॒ज्ञं पाहि॑ य॒ज्ञप॑तिं पाहि मां य॑ज्ञ॒नियं॑ ॥ 20

TS 1.1.11.2 -Padam

दक्षि॑णः । यज॑मानस्य । परि॒धिरि॑ति परि – धिः । इडः । ईडि॒तः ।
मि॒त्रावरु॑णा॒विति॑ मि॒त्रा – वरु॑णौ । त्वा । उत्त॑रत इत्युत् – तरतः ।
परी॑ति । ध॒त्ताम् । ध्रु॒वेण॑ । धर्म॑णा । यज॑मानस्य । परि॒धिरि॑ति परि-धिः ।
इडः । ईडि॒तः । सूर्यः॑ । त्वा । पु॒रस्ता॑त् । पा॒तु । कस्याः॑ । चि॒त् ।
अ॒भि॒श॒स्त्या इत्य॑भि – श॒स्त्याः । वी॒तिहो॑त्रमि॒ति वी॒ति – हो॑त्रम् ।
त्वा । क॒वे । द्यु॒मन्त॑मि॒ति द्यु – मन्त॑म् । समि॑ति । इ॒धीम॑हि ।
अ॒ग्ने॑ । बृ॒हन्त॑म् । अ॒ध्वरे॑ । वि॒शः । य॒न्त्रे इति॑ । स्थः । वसू॑नाम् ।
रु॒द्राणा॑म् । आ॒दि॒त्याना॑म् । सद॑सि । सीद॑ । जु॒हूः ।
उ॒प॒भृदि॑त्युप – भृत् । ध्रु॒वा । अ॒सि । घृ॒ताची॑ । नाम्ना॑ । प्रि॒येण॑ ।
नाम्ना॑ । प्रि॒ये । सद॑सि () । सीद॑ । ए॒ताः । अ॒सद॑न् ।
सु॒कृत॑स्येति सु-कृत॑स्य । लो॒के । ताः । वि॑ष्णो इति । पाहि । पाहि ।

य॒ज्ञम् । पा॒हि । य॒ज्ञप॑ति॒मिति॑ य॒ज्ञ-प॒तिम् । पा॒हि । मा॒म् ।

य॒ज्ञनि॑य॒मिति॑ य॒ज्ञ - नि॒यम् ॥ 20 (65)

(बा॒हुर॑सि - प्रि॒ये स॑द॒सि - पञ्च॑द॒श च) (A11)

TS 1.1.12.1

भु॒वन॑म॒सि वि प्र॑थ॒स्वाग्ने॑ य॒ष्टरि॑दं नमः ।

जु॒ह्वे॒ह्यग्नि॑स्त्वा॒ ह्वय॑ति दे॒वय॑ज्याया॒ उप॑भृ॒देहि॑ दे॒वस्त्वा॑ स॒विता॑ ह्वयति
दे॒वय॑ज्याया॒ अग्ना॑विष्णू॒ मा वा॒मव॑ क्र॒मिषं॑ वि जिहा॒थां मा मा॒ सं ता॑प्तं
लो॒कं मे॑ लो॒ककृ॑तौ कृ॒णुतं॑ वि॒ष्णोः॑ स्था॒नम॑सीत इन्द्रो॑ अकृ॒णोद्
वी॒र्या॑णि स॒मा॒रभ्यो॑र्द्ध्वो अ॒र्द्ध्वरो॑ दि॒विस्पृ॑शम॒हुतो॑ ()

य॒ज्ञो य॒ज्ञप॑ते-रिन्द्रा॒वान्थ् स्वा॑हा बृ॒हद्-भाः॑ पा॒हि मा॑ ऽग्ने॒ दुश्च॑रि॒तादा॑
मा सु॑चरि॒ते भ॑ज म॒खस्य॑ शिरो॑ ऽसि॒ सं ज्यो॑तिषा॒ ज्योति॑रङ्क्तां ॥ 21

TS 1.1.12.1 –Padam

भु॒वन॑म् । अ॒सि । वी॒ति । प्र॒थस्व॑ । अग्ने॑ । य॒ष्टः । इ॒दम् । नमः॑ ॥

जु॒हु । ए॒ति । इ॒हि । अ॒ग्निः । त्वा॒ । ह्व॒यति॑ । दे॒वय॑ज्याया॒ इति॑
दे॒व -य॑ज्यायै॑ । उप॑भृ॒दित्यु॑प -भृ॒त् । ए॒ति । इ॒हि । दे॒वः । त्वा॒ ।
स॒विता॑ । ह्व॒यति॑ । दे॒वय॑ज्याया॒ इति॑ दे॒व -य॑ज्यायै॑ ।

अ॒ग्ना॒वि॒ष्णू॒ इत्य॑ग्ना॒ – वि॒ष्णू॒ । मा ।

वा॒म् । अ॒वेति॑ । क्र॒मि॒षम् । वी॒ति । जि॒हा॒थाम् । मा । मा । स॒मिति॑ ।

ता॒प्तम् । लो॒कम् । मे । लो॒क॒कृ॒ता॒विति॑ लो॒क॒–कृ॒तौ । कृ॒णु॒तम् ।

वि॒ष्णोः॑ । स्था॒नम् । अ॒सि । इ॒तः । इ॒न्द्रः । अ॒कृ॒णो॒त् । वी॒र्या॑णि ।

स॒मा॒र॒भ्येति॑ सं–आ॒र॒भ्य । ऊ॒र्ध्वः । अ॒र्ध्वः । दि॒वि॒स्पृ॒शमि॑ति

दि॒वि –स्पृ॒शम् । अ॒हु॒तः () । य॒ज्ञः । य॒ज्ञप॑ते॒रिति॑ य॒ज्ञ – प॒तेः ।

इ॒न्द्रा॒वा॒निती॑न्द्र – वा॒न् । स्वा॒हा । बृ॒हत् । भाः । पा॒हि । मा । अ॒ग्ने ।

दु॒श्च॑रि॒ता॒दिति॑ दुः – च॒रि॒ता॒त् । ए॒ति । मा । सु॒च॑रि॒त इति॑ सु – च॒रि॒ते ।

भ॒ज । म॒ख॒स्य । शि॒रः । अ॒सि । स॒मिति॑ । ज्यो॒तिषा॑ । ज्यो॒तिः ।

अ॒ङ्क्ता॒म् ॥ 21 (71) (अ॒हु॒त – ए॒कवि॑ंशतिश्च) (A12)

TS 1.1.13.1

वा॒जस्य॑ मा प्र॒स॒वेनो॑द्ग्रा॒भेणो॑–द॒ग्रभी॑त् ।

अथा॑ स॒प॒त्नाꣳ इ॒न्द्रो मे॑ नि॒ग्रा॒भेणा॑ध॒राꣳ अ॒कः ॥

उ॒द्ग्रा॒भं च॑ नि॒ग्रा॒भं च॑ ब्र॒ह्म दे॒वा अ॑वीवृ॒धन् ।

अथा॑ स॒प॒त्नानि॑न्द्रा॒ग्नी मे॑ वि॒षू॒ची॒नान् व्य॑स्यतां ॥

वसु॑भ्यस्त्वा रु॒द्रेभ्य॑स्त्वा ऽऽदि॒त्येभ्य॑स्त्वा ऽक्त॑ रिहा॒णा वि॒यन्तु॑ वयः॑ ॥

प्र॒जां यो॑निं मा निर्मृ॑क्षमा प्याय॑न्तामाप॒ ओष॑धयो

मरु॑तां पृष॑तयः स्थ दि॒वं – [] 22

TS 1.1.13.1 –Padam

वाज॑स्य । मा । प्र॒स॒वेने॑ति प्र-स॒वेन॑ । उ॒द्ग्रा॒भेणे॑त्युत् – ग्रा॒भेण॑ ।

उदि॑ति । अ॒ग्रभी॑त् ॥ अथ॑ । स॒प॒त्नान् । इन्द्रः॑ । मे । नि॒ग्रा॒भेणे॑ति

नि-ग्रा॒भेण॑ । अध॑रान् । अ॒कः ॥ उ॒द्ग्रा॒भमि॑त्युत् –ग्रा॒भम् । च॒ ।

नि॒ग्रा॒भमि॑ति नि –ग्रा॒भम् । च॒ । ब्र॒ह्म । दे॒वाः । अ॒वीवृ॑धन् ॥ अथ॑ ।

स॒प॒त्नान् । इन्द्रा॑ग्नी इतीन्द्र-अ॒ग्नी । मे । वि॒षूची॑नान् । वी॒ति ।

अ॒स्य॒ताम् ॥ वसु॑भ्य इति वसु-भ्यः॑ । त्वा । रु॒द्रेभ्यः॑ । त्वा ।

आ॒दि॒त्येभ्यः॑ । त्वा । अ॒क्तम् । रिहा॒णाः । वि॒यन्तु॑ । वयः॑ ॥

प्र॒जामि॑ति प्र-जा॒म् । योनि॑म् । मा । निरि॑ति । मृ॒क्षम् । ए॒ति ।

प्याय॑न्ताम् । आपः॑ । ओष॑धयः । मरु॑ताम् । पृष॑तयः ।

स्थ॑ । दि॒वं ॥ 22 (50)

TS 1.1.13.2

गच्छ॑ ततो॑ नो॒ वृष्टि॑मे॒रय॑ ।
आ॒यु॒ष्पा अ॒ग्ने ऽस्या॑यु॒र्मे पा॒हि चक्षु॑ष्पा अ॒ग्ने ऽसि॑ चक्षु॒र्मे पा॒हि
ध्रु॒वा ऽसि॑ यं परि॒धिं पर्य॑धत्था अ॒ग्ने दे॒व प॒णिभिर्वी॑यमाणः ।
तं त॑ ए॒तम॒नु जोषं॑ भ॒रामि॑ ने॒देष॑ त्वद॒पचे॑तया॒तैय॑ज्ञस्य॒ पाथ॑
उप॑ समि॒तꣳ सꣳस्रा॒वभा॑गाः स्थे॒षा बृ॒हन्तः॑ प्र॒स्तरे॒ष्ठा

बर्हि॑षदश्च-[] 23

TS 1.1.13.2 –Padam

गच्छ॑ । ततः॑ । नः॑ । वृष्टि॑म् । एति॑ । ई॒रय॑ ॥ आ॒यु॒ष्पा इत्या॑युः- पाः ।
अ॒ग्ने । अ॒सि । आ॒युः । मे॑ । पा॒हि । चक्षु॑ष्पा इति॑ चक्षुः - पाः ।
अ॒ग्ने । अ॒सि । चक्षुः॑ । मे॑ । पा॒हि । ध्रु॒वा । अ॒सि । यम् ।
परि॒धिमि॑ति परि - धिम् । पर्य॑धत्था इति॑ परि - अध॑त्थाः । अ॒ग्ने । दे॒व ।
प॒णिभि॑रिति॑ प॒णि - भिः । वी॒यमा॑णः ॥ तम् । ते॑ । ए॒तम् । अ॒न्विति॑ ।
जोष॑म् । भ॒रामि॑ । न । इत् । ए॒षः । त्वत् ।
अ॒पचे॑तया॒ता इत्य॑प - चे॒तया॑तै । य॒ज्ञस्य॑ । पा॒थः । उप॑ । समि॒ति ।
इ॒तम् । सꣳस्रा॒वभा॑गा इति॑ सꣳस्रा॒व - भा॑गाः । स्थ॑ । इ॒षाः । बृ॒हन्तः॑ ।

प्र॒स्तरे॒ष्ठा इति॑ प्र॒स्तरे॑-स्थाः । ब॒र्हि॒षद॒ इति॑ ब॒र्हि॑-सदः ।

च । 23 (50)

TS 1.1.13.3

दे॒वा इ॒मां वा॑च॒मभि॑ वि॒श्वे गृ॑णन्त॒ आ॒सद्या॑स्मिन् ब॒र्हि॒षि मा॑दय॒द्ध्वम॒ग्नेर्
वा॒मप॑न्नगृह॒स्य सद॑सि सा॒दया॑मि सु॒म्नाय॑ सु॒म्निनी॑ सु॒म्ने मा॑ ध॒त्तं धु॒रि
धु॒र्यो पा॑त॒मग्ने॑ ऽद॒ब्धायो॑ ऽशी॒तत॑नो पा॒हि मा॒ ऽद्य दि॒वः पा॒हि प्र॑सि॒त्यै
पा॒हि दु॑रि॒ष्ट्यै पा॒हि दु॑र॒द्मन्यै॑ पा॒हि दु॑श्च॒रिता॑दविषं नः पि॒तुं कृ॑णु सु॒षदा॑
योनि॑ स्वा॒हा दे॒वा गा॑तुविदो गा॒तुं वि॒त्त्वा गा॒तु () -मि॒त मन॑सस्पत
इ॒मं नो॑ दे॒व दे॒वेषु॑ य॒ज्ञ स्वा॒हा वा॒चि स्वा॒हा वा॒ते धाः ॥ 24

TS 1.1.13.3 –Padam

दे॒वाः । इ॒माम् । वा॑च॒म् । अ॒भीति॑ । वि॒श्वे । गृ॑णन्तः । आ॒सद्येत्या॑-सद्य॑ ।
अ॒स्मिन् । ब॒र्हि॒षि । मा॑दय॒द्ध्वम् । अ॒ग्नेः । वा॒म् ।
अ॒प॒न्नगृ॑ह॒स्येत्य॑प॒न्न - गृ॑ह॒स्य । सद॑सि । सा॒दया॑मि । सु॒म्नाय॑ ।
सु॒म्निनी॑ इति॑ । सु॒म्ने । मा॑ । ध॒त्तम् । धु॒रि । धु॒र्यो । पा॑त॒म् । अ॒ग्ने ।
अ॒द॒ब्धायो॑ इत्य॑द॒ब्ध-आ॒यो । अ॒शी॒तत॑नो इत्य॑शी॒त -त॑नो । पा॒हि । मा॑ ।

अ॒द्य । दि॒वः । पा॒हि । प्र॒सि॒त्या इति॑ प्र-सि॒त्यै । पा॒हि । दु॒रि॒ष्ट्या इति॑
दुः -इ॒ष्ट्यै । पा॒हि । दु॒र॒द्भ॒न्या इति॑ दुः -अ॒द्भ॒न्यै । पा॒हि । दु॒श्च॒रि॒तादि॒ति
दुः - च॒रि॒तात् । अ॒वि॒षम् । नः । पि॒तुम् । कृ॒णु । सु॒षदे॒ति सु -सदा॑ ।
यो॒निम् । स्वाहा॑ । दे॒वाः । गा॒तु॒वि॒द इति॑ गा॒तु-वि॒दः । गा॒तुम् । वि॒त्त्वा ।
गा॒तुम् () । इ॒त । म॒न॒सः । प॒ते । इ॒मम् । नः । दे॒व । दे॒वेषु॑ । य॒ज्ञम् ।
स्वाहा॑ । वा॒चि । स्वाहा॑ । वा॒ते । धाः ॥ 24 (63)

(दि॒वं - च - वि॒त्त्वा गा॒तुं - त्रयो॑दश च) (A13)

TS 1.1.14.1

उ॒भा वा॒मि॒न्द्रा॒ग्नी आ॒हु॒व॒द्ध्य॑ उ॒भा रा॒ध॒सः स॒ह मा॒द॒य॒द्ध्यै॑ ।
उ॒भा दा॒ता॒रा॒वि॒षाँ र॒यी॒णामु॒भा वा॒ज॒स्य सा॒तये॑ हु॒वे वां ॥
अ॒श्र॒वँ हि भू॒रि॒दा॒व॒त्तरा॑ वां वि॒जा॒मा॒तु॒रु॒त वा घा॑ स्या॒लात् ।
अथा॑ सो॒म॒स्य प्र॒य॒ती यु॒व॒भ्या॒मि॒न्द्रा॒ग्नी स्तो॒मं ज॒न॒यामि॑ न॒व्यं ॥
इ॒न्द्रा॒ग्नी न॒व॒तिं पु॒रो दा॒स॒प॒त्नी॒र॒धू॒नु॒तं ।
सा॒क॒मे॒के॒न क॒र्म॒णा ॥
शु॒चिं नु स्तो॒मं न॒व॒जा॒त-म॒द्ये॒न्द्रा॒ग्नी वृ॒त्र॒ह॒णा जु॒षे॒थां ॥ 25

TS 1.1.14.1-Padam

उ॒भा । वा॒म् । इ॒न्द्रा॒ग्नी॒ इती॑न्द्र – अ॒ग्नी॒ । आ॒हु॒व॒द्ध्यै॑ ॥ उ॒भा ।
रा॒ध॒सः॑ । स॒ह । मा॒द॒य॒द्ध्यै॑ ॥ उ॒भा । दा॒तारौ॑ । इ॒षाम् । र॒यी॒णाम् ।
उ॒भा । वा॒ज॒स्य॑ । सा॒त॒यै॑ । हु॒वे॑ । वा॒म् ॥ अ॒श्र॒व॒म् । हि॒ ।
भू॒रि॒दा॒व॒त्त॒रे॒ति॑ भू॒रि॒दा॒व॒त् – त॒रा॒ । वा॒म् ।
वि॒जा॒मा॒तु॒रि॒ति॑ वि– जा॒मा॒तुः॑ । उ॒त । वा॒ । घ॒ । स्या॒ला॒त् ॥
अ॒थ॑ । सो॒म॒स्य॑ । प्र॒य॒ती॒ति॑ प्र–य॒ती॒ । यु॒व॒भ्या॒मि॒ति॑ यु॒व – भ्या॒म् ।
इ॒न्द्रा॒ग्नी॒ इती॑न्द्र – अ॒ग्नी॒ । स्तो॒म॒म् । ज॒न॒या॒मि॒ । न॒व्य॒म् ॥ इ॒न्द्रा॒ग्नी॒
इती॑न्द्र – अ॒ग्नी॒ । न॒व॒ति॒म् । पु॒रः॑ । दा॒स॒प॒त्नी॒रि॒ति॑ दा॒स – प॒त्नीः॑ ।
अ॒धू॒नु॒त॒म् ॥ सा॒क॒म् । ए॒के॒न॑ । क॒र्म॒णा॑ ॥ शु॒चि॒म् । नु॒ । स्तो॒म॒म् ।
न॒व॒जा॒त॒मि॒ति॑ न॒व– जा॒त॒म् । अ॒द्य॑ । इ॒न्द्रा॒ग्नी॒ इती॑न्द्र – अ॒ग्नी॒ ।
वृ॒त्र॒ह॒णे॒ति॑ वृ॒त्र – ह॒ना॒ । जु॒षे॒था॒म् ॥ 25 (50)

TS 1.1.14.2

उ॒भा हि॑ वा॒ꣳ सु॒ह॒वा॒ जो॒ह॒वी॒मि॒ ता॒ वा॒ज॒ꣳ स॒द्य॑ उ॒श॒ते॑ धे॒ष्ठा॑ ॥
व॒य॒मु॒ त्वा॑ प॒थ॒स्प॒ते॑ र॒थं॑ न॒ वा॒ज॒सा॒त॒ये॑ ।
धि॒ये॑ पू॒ष॒न्न॒यु॒ज्म॒हि॑ ॥

पथस्पथः॑ परिपतिं॑ वचस्या॑ कामेन॑ कृतो॑ अभ्या॑नडर्कं॑ ।
 स नो॑ रा॒सच्छु॑रु॒धश्चन्द्रा॑ग्रा॒ धिय॑न्धिय॑ꣳ सीष॑धाति॒ प्र पू॒षा ॥
 क्षेत्र॑स्य॒ पति॑ना वय॑ꣳ हि॒तेने॑व जयाम॑सि ।
 गाम॑श्चं पोष॑यित्त्वा स नो॑ –[] 26

TS 1.1.14.2-Padam

उ॒भा । हि । वा॒म् । सु॒हवे॑ति॒ सु-ह॑वा । जो॒हवी॑मि । ता । वाज॑म् ।
 स॒द्यः । उ॒शते॑ । धे॒ष्ठा ॥ व॒यम् । उ । त्वा । प॒थः । प॒ते । र॒थम् । न ।
 वाज॑सातय॒ इति॑ वाज॑-सा॒तये ॥ धि॒ये । पू॒षन् । अ॒युज्म॑हि ॥ पथ॑स्पथ॒
 इति॑ प॒थः – प॒थः । परि॑पति॒मिति॑ परि॑-पति॒म् । व॒च॒स्या । का॒मेन॑ ।
 कृ॒तः । अ॒भीति॑ । आ॒नट् । अ॒र्कम् ॥ सः । नः । रा॒सत् । शु॒रुधः॑ ।
 च॒न्द्राग्रा॑ इति॑ च॒न्द्र – अ॒ग्राः । धि॒यन्धिय॑मिति॒ धियं॑ – धि॒यम् ।
 सीष॑धाति॒ । प्रेति॑ । पू॒षा ॥ क्षेत्र॑स्य । पति॑ना । व॒यम् । हि॒तेन॑ । इ॒व ।
 ज॒याम॑सि ॥ गा॒म् । अ॒श्वम् । पो॒षयि॑न्तु । एति॑ । सः । नः । 26 (50)

TS 1.1.14.3

मृ॒डाती॑दृ॒शे ॥
 क्षेत्र॑स्य प॒ते म॑धु॒मन्त॑मूर्मिं॒ धे॒नुरि॑व॒ पयो॑ अ॒स्मासु॑ धुक्ष्व ।

म॒धु॒श्रु॒तं॑ घृ॒तमि॒व सु॒पू॒तमृ॒तस्य॑ नः॒ पत॑यो मृ॒डय॑न्तु ॥
अ॒ग्ने न॑य सु॒पथा॑ रा॒ये अ॒स्मान् वि॒श्वानि॑ दे॒व व॒युना॑नि वि॒द्वान् ।
यु॒योद्ध्य॑स्म-ज्जु॒हुरा॑णमे॒नो भू॑यि॒ष्ठां ते॒ नम॑उक्तिं वि॒धेम ॥
आ दे॒वाना॑मपि पन्था॑मगन्म यच्छ॒क्नवाम॑ तदनु॒ प्रवो॑ढुं ।
अ॒ग्निर् वि॒द्वान्त्स य॑जा॒त् - [] 27

TS 1.1.14.3-Padam

मृ॒डा॒ति । ई॒दृशे॑ ॥ क्षे॒त्रस्य॑ । प॒ते । म॒धुम॑न्तमि॒ति म॒धु-म॑न्तम् ।
ऊ॒र्मिम् । धे॒नुः । इ॒व । प॒यः । अ॒स्मासु॑ । धु॒क्ष्व ॥
म॒धुश्रु॒तमि॒ति म॒धु-श्रु॒तम् । घृ॒तम् । इ॒व । सु॒पू॒तमि॒ति सु-पू॒तम् ।
ऋ॒तस्य॑ । नः॒ । प॒तयः॑ । मृ॒डय॑न्तु ॥ अ॒ग्ने । न॑य । सु॒पथे॑ति सु-प॒था ।
रा॒ये । अ॒स्मान् । वि॒श्वानि॑ । दे॒व । व॒युना॑नि । वि॒द्वान् ॥ यु॒यो॒धि ।
अ॒स्मत् । जु॒हुरा॑णम् । ए॒नः । भू॑यि॒ष्ठाम् । ते॒ ।
नम॑उक्तिमि॒ति नमः॑-उ॒क्तिम् । वि॒धेम ॥ ए॒ति । दे॒वाना॑म् । अ॒पीति॑ ।
पन्था॑म् । अ॒गन्म॑ । यत् । श॒क्नवाम॑ । तत् । अ॒न्विति॑ । प्रवो॑ढुमि॒ति
प्र-वो॑ढुम् ॥ अ॒ग्निः । वि॒द्वान् । सः । य॒जा॒त् । 27 (50)

TS 1.1.14.4

से॒दु॒ हो॒ता सो॒ अ॒ध्व॒रान्त् स ऋ॒तून् क॒ल्प॒याति॑ ॥

यद्-वा॒हि॒ष्ठं तद॒ग्नये॑ बृ॒हद॑र्च वि॒भाव॒सो ।

महि॑षी॒व त्वद्-र॒यि-स्त्वद्-वा॒जा उ॒दी॒रते॑ ॥

अ॒ग्ने त्वं पा॒रया॑ न॒व्यो अ॒स्मान्त् स्व॒स्तिभि॑रति॒ दु॒र्गाणि॑ वि॒श्वा ।

पू॒श्च पृ॒थ्वी ब॒हु॒ला न उ॒र्वी भ॒वा तो॒काय॑ तन॒याय॑ शं योः ॥

त्वम॑ग्ने व्रत॒पा अ॒सि दे॒व आ () म॒र्त्येष्वा॑ । त्वं य॒ज्ञेष्वी॑ड्यः ॥

यद्-वो॑ व॒यं प्र॒मिना॑म व्रतानि वि॒दुषां॑ दे॒वा अ॒वि॒दुष्ट॑रासः ।

अ॒ग्निष्टद् वि॒श्वमा॑ पृ॒णाति॑ वि॒द्वान् येभि॑र् दे॒वा ऋ॒तुभिः॑ क॒ल्प॒याति॑ ॥ 28

TS 1.1.14.4-Padam

सः । इत् । उ । हो॒ता । सः । अ॒ध्व॒रान् । सः । ऋ॒तून् । क॒ल्प॒याति॑ ॥

यत् । वा॒हि॒ष्ठम् । तत् । अ॒ग्नये॑ । बृ॒हत् । अ॒र्च । वि॒भाव॒सो इति॑

वि॒भा-व॒सो ॥ महि॑षी । इ॒व । त्वत् । र॒यिः । त्वत् । वा॒जाः । उ॒दि॒ति ।

ई॒रते॑ ॥ अ॒ग्ने । त्वम् । पा॒रय॑ । न॒व्यः । अ॒स्मान् । स्व॒स्तिभि॑रिति॒

स्व॒स्ति -भिः॑ । अ॒तीति॑ । दु॒र्गाणीति॑ दुः -गा॒नि । वि॒श्वा ॥ पूः । च ।

पृ॒थ्वी । ब॒हु॒ला । नः । उ॒र्वी । भ॒व । तो॒काय॑ । तन॒याय॑ । शम् । योः ॥

त्वम् । अ॒ग्ने । व्र॒त॒पा इति॑ व्रत- पाः । अ॒सि । दे॒वः । एति॑ () ।
मर्त्ये॑षु । आ ॥ त्वम् । य॒ज्ञेषु॑ । ई॒ड्यः ॥ यत् । वः । व॒यम् ।
प्र॒मि॒नामेति॑ प्र-मि॒नाम॑ । व्र॒तानि॑ । वि॒दुषाम्॑ । दे॒वाः ।
अवि॑दुष्ट॒रास॑ इत्यवि॑दुः – त॒रासः॑ ॥ अ॒ग्निः । तत् । वि॒श्वम्॑ ।
एति॑ । पृ॒णाति॑ । वि॒द्वान् । येभिः॑ । दे॒वान् । ऋ॒तुभि॒रित्यृ॒तु -भिः॑ ।
क॒ल्पया॑ति ॥ 28 (73)

(जु॒षेथा॒मा – स नो॑ – य॒जा – दा – त्रयो॑वि॒ंशति॑श्च) (A14)

=====

Prasna Korvai with starting Padams of 1 to 14 Anuvaakams :-

(इ॒षे त्वा॑ – य॒ज्ञस्य॑ – शु॒न्ध॑ध्वं – क॒र्मणे॑ वां – दे॒वो –
ऽव॑धू॒तं – धृ॒ष्टिः – सं व॑पा – म्या द॑दे – प्र॒त्युष्टं॑ – कृ॒ष्णो॑ऽसि –
भुव॑नम॒सि – वा॒ज – स्यो॑भा वां – च॒तु॑र्द॒श ।)

Korvai with starting Padams of 1, 11, 21 Series of Panchaatis :-

(इ॒षे – दृ॒ह – भुव॑न – म॒ष्टावि॑श॒तिः ।)

First and Last Padam of First Prasnam :-

(इ॒षे त्वा॑ – क॒ल्प॑याति ।)

॥ हरिः॑ ओं ॥

कृष्ण यजुर्वेदीय तैत्तिरीय संहिता पद पाठे प्रथमकाण्डे

प्रथमः प्रश्नः समाप्तः

Summary breakup of Padam - in Kaandam 1, Prasnam 1

Particulars		Example (in Pada PaaTam)	No of Padams as per Pada PaaTam
सामान्य पदानि	Ord	इषे । त्वा । ऊर्जे ।	1179
उपसर्ग पदानि	PRE	एति = (आ+इति) । उपेति = (उप+इति) । प्रेति = (प्र+इति) ।	104
वेष्टन पदानि	PS	उपायवः = उपायव इत्युप - आयवः । बाहुभ्याम् = बाहुभ्यामिति बाहु - भ्याम्) ।	234
प्रग्रह पदानि	PG	ते = (ते इति) । त्वे = (त्वे इति) । चक्षुषी = (चक्षुषी इति) । विष्णो = विष्णो इति ।	4
प्रग्रह वेष्टन पदानि	PGS	अधिषवणे = अधिषवणे इत्यधि - सवने । इन्द्राग्री = इन्द्राग्री इतीन्द्र - अग्री	9
Total Padams			1530

Details of Panchati and Padam for Kandam 1 – Prasanam 1 – TS 1.1

	Panchati	Padams
Anuvakam 1	1	43
Anuvakam 2	2	88
Anuvakam 3	1	58
Anuvakam 4	2	96
Anuvakam 5	2	111
Anuvakam 6	1	65
Anuvakam 7	2	98
Anuvakam 8	1	72
Anuvakam 9	3	161
Anuvakam 10	3	166
Anuvakam 11	2	115
Anuvakam 12	1	71
Anuvakam 13	3	163
Anuvakam 14	4	223
	28	1530